

Pāngarau

Tautuhinga Aromatawai Ā-Waho 2024

Te Paerewa Paetae

32412

Te Ingoa

Te whakamahi pāngarau hei whakaoti rapanga o te ao o te ākonga

Te Marautanga

Te Marautanga o Aotearoa

Ngā Whiwhinga

E 10

Te Tukanga Aromatawai

He Kete Manarua

Te Wā Tuku Aromatawai

1 o Oketopa 2024 ki te 30 o Oketopa 2024

Kete Manarua

Kete - ko te kete i pū mai i te pā harakeke me tōna whakapapa.

Manarua – e rua ōna mana. Tuatahi, ko te mana o ngā taonga ka kohikohia me ngā mahi huhua ka whakatutukihia e te ākonga. Tuarua, ko te mana o te ākonga, ko tōna whānau, hapū, me tōna iwi hoki, ko tōna ake mana motuhake tonu.

He tāpaetanga ā-matihiko te āhua o te KETE MANARUA ka tukuna mai e te kura, ā, he kōpaki, he kiriata, he kōrero ā-waha, he rauata, he tuhinga, he pūrongo, he whakaaturanga, he rātaka, he mahi rangahau aha atu aha atu.

Te Whakatakotoranga Aromatawai

He kohinga mahi, taunaki rānei nā te ākonga i whakaoti i te roanga ake o te tau hei whakatutuki i ngā Whānuitanga o ngā Paearu Mahi me te Putanga ako, ki konei te ākonga e eke ai i te Paerewa.

He Tūmahi Aromatawai e ārahi ana i te ākonga ki te whakatutuki i ngā Whānuitanga o ngā Paearu mahi. E whakaatu ana te Kete Manarua i tētahi taurira hei kōwhiringa mā te pouako. Ka whakamahia rānei, he mahi whakawai rānei, ka whakarite Tūmahi Aromatawai anō rānei, kei te pouako te tikanga.

Kia whakamahi pāngarau hei whakaoti rapanga o te ao o te ākongā, ā, ka whakakaupapa i ngā pūāhua, ka whakamahi i ngā tikanga pāngarau, ka whakamāori hoki i te whaitake o ngā urupare pāngarau ki ngā pūāhua.

E whai ake nei ko ngā Tūmahi Aromatawai i te Kete Manarua (Pouako), he tauira hei kōwhiringa mā te pouako, heoi, ki te whakarite Tūmahi Aromatawai kē te pouako tērā pea he rautaki aromatawai kē āna, hei tauira; he kōrero ā-waha, he kauwhau, he whakaaturanga.

Ko te 'Haerenga o te kura ki ngā whakataetae kapa haka ā motu mō ngā kura tuarua' te kaupapa matua, ā, e rima ngā horopaki me ōna ngohe i tēnei Tūmahi Aromatawai hei whakatutuki mā te ākongā:

1. Ngā tauira kākahu

E rua ngā mahi o tēnei ngohe; He mahi rangahau, he mahi tā, he mahi whakatau tauira, he whakamārama whakaaro me te tautuhi tukanga/āhuatanga pāngarau.

2. Ngā utu o te haerenga

E rua ngā mahi o tēnei ngohe; he mahi whiriwhiri, he mahi whakatau, he mahi tātai hei whakatau i te whakatutu.

3. Te kōhi pūtea mā te tunu pihikete

E rua ngā mahi o tēnei ngohe hei whakamātau pūkenga; he mahi rangahau, he mahi whakarea inenga me ngā tukanga pāngarau Ine me te Pāngarau whakahāngai.

4. Kapa haka me ngā ahunga nekehanga

Kotahi te mahi o tēnei ngohe, ko te whakatau, ko te whakaatu tātai ahunga me ngā tukanga pāngarau Te Wāhi me te Ahunga.

5. Kapa Haka me ngā tauanga kapa haka

E rua ngā mahi o tēnei ngohe hei whakakapi i te kaupapa kapa haka.

Ko te tuatahi, he tuhi i ngā momo pātai: whakatairite, pānga, tūhura, whakarāpopoto, ko te tūhura taurangi.

Ka mutu ko te rangahau i te whakautu o ngā pātai i whakaritea ki ngā tukanga pāngarau: tūhura tauanga, tātari raraunga me te whakatau i ngā kitenga o te tūhura raraunga.

Ngā Herenga Aromatawai

He mahi takitahi tēnei mahi nā te ākongā; me te whakatakoto taunakitanga mō te aromatawai ā-waho. He Kete Manarua ā-matihiko anake.

Kia tutuki pai te Kete Manarua ā-matihiko nei:

- me whakaputa hei PDF;
- me noho te rahinga tuari ki raro i te 5GB e pai ai te tārewatanga o ngā mahi ki te Online Digital Submission Portal;
- me tika te whakaraupapatanga o ngā mahi;
- me tika te whakatakotoranga o ngā mahi (kia kaua e noho tītaha, huripoki rānei);
- me tāmāua te kiriata ki te tītohunga ataata, ā, kua rāhuitia te tukuhanga noa i te honongaitua me tana kotahi.

Te Motuhēhē o ngā mahi a ngā ākongā

Me pēhea e mōhio ai te motuhēhē a ngā mahi o ngā ākongā? He tukanga, he taunakitanga e mōhio ai nā te ākongā ake āna mahi aromatawai. Kia mataara ngā ākongā, ngā kaiako me te whānau hoki o te kura ki te motuhēhē o ngā mahi a ngā ākongā.

He māmā noa iho te tiki mahi a tangata kē, heoi, mā te mihi e whakaatu, e whakanui hoki i ngā tāngata me ngā puna āwhina i puta ai ngā mahi a ngā ākongā.

Hei tauira:

- He rerenga kupu poto e tohu ana i te pūtakenga mai o tētahi kōrero;
- He rārangi tohutoro i te whārangi whakamutunga o ngā mahi;
- He mihi ki te tangata | puna āwhina;
- Ngā momo puna āwhina, puna kōrero rānei:
 - » Kōrero ā-waha: he uiui kaumātua, pakeke, rangatira, mātanga rānei;
 - » Ngā pukapuka i whakaputa;
 - » Ngā pukapuka kāore i whakaputa;
 - » Wāhitau ipurangi.

He kōrero anō i ngā wāhitau ipurangi o te paetukutuku NZQA:

- [Authenticity: NZQA](#)
- [Myth 3 Managing authenticity: NZQA](#)
- [Authenticity of externally assessed standards: NZQA](#)
- [Guidance on the acceptable use of Artificial Intelligence: NZQA](#)

Te Tāpaetanga me te Hāponotanga

Hei te Wāhanga Tuatoru o te tau Kura a NZQA e tuku atu ai ngā tohutohu mō te tāpae mai i ngā taunakitanga o ngā Kete Manarua nei.

Kāore te Kete Manarua matihiko e whakahokia ki te ākongā. Mēnā he kōrero anō mō te tāpaetanga me te hāponotanga o te mahi, mā te tari o NZQA e pānui atu ki ngā kura.

Mēnā kei te hiahia āwhina ki te tuku atu i ngā tāpaenga Kete Manarua:

- Īmēra mai ki assessment.servicecentre@nzqa.govt.nz,
- waea rānei i te NZQA Contact Centre mā te nama 0800 687 296.

